

神異典第二百三十九卷

神仙部列傳十六

梁二 周子良

按周氏冥通記元人周子良字元和茅山陶隱居之弟子也本豫州汝南郡汝南縣都鄉吉遷里人寓居丹陽建康西鄉清化里世爲胄族江左有聞晚葉彫流淪胥以瘁祖文朗舉秀才宋江夏王國左常侍所生父耀宗小名金剛文朗第五子郡五官掾別住餘姚天監二年亡年三十四仍假葬焉所繼伯父耀旭本州主簿揚州議曹從事母永嘉徐淨光懷娠五月夢一切仙室中聖皆起行四面來繞己身乃以建武四年丁丑歲正月二日人定時生於餘姚明星里期歲爲婢寶光所攝養同如母之義子良幼植端惠立性和雅家人未嘗見其愠色十歲隨其所養母還永嘉天監七年隱居東遊海嶽權住永嘉清嶂山隱居入東本往餘姚乘舫取晉安霍山平晚下浙江而潮來奔騰洶湧非人力所能制因仍上東陽欲停此住忽值永嘉人談述彼山水甚美復相隨度嶠至郡投永嘉令陸襄陸仍自送憩天師治堂而子良始已寄治內住於此相識今討覈緣由如神靈所召故其得來此

山不爾莫測其然於時子夏年十二仍求入山服節爲弟子始受仙靈錄老子五千文西嶽公禁虎豹符便專心於香燈之務凡好書畫人間雜伎經心則能後隨往南霍及反木溜旦夕承奉必盡恭勤十一年從還茅嶺此後進受五嶽圖三皇內文十二年秋其家中表親族來投山居乃出就西阿別廨住以十四年乙未歲五月二十三夏至日於廨忽未中寢臥彌淪良久乃起出姨母不解所以深加辯切乃頗說所見具如別記自爾於四五旬中大覺爲異恆垂簾掩扉斷人入室燒香獨住日中止進一升蜜餐周家本事俗神姨舅及道義咸恐是俗神所假或謂欲染邪氣亟相感問唯答云許終是婁羅夢無所知究自懷愁慮爲復斷隔耳於是衆人莫測可否相與縱置聽看趣向其七月申乃密受真旨令外混世迹勿使疑異從此趨走執事乃過於常日其年十月從移朱陽師後別居東山便專住西館掌理外任應接道俗莫不愛敬本性君子訥言敏行所可云爲默而能濟清修公正纖毫無私去冬欲潛依冥旨逆須別字託以方便冒求構立雖建三間齋屋經時未畢入此年十月便密自成辦窗戶牀簾至十九乃竟親屬道義齋其上果要往看之覺其潛形惻容並莫知所以至二十六日密封題東西館諸戶閣廨處磨洗以文簿器物料付何文幸爾夕自攜衾枕出所住廨

云當暫齋或云暫行二十七旦獨往住家廡及還館中言色平然了無一異更香湯沐浴著諸淨衣
與文幸基博讀書而屢瞻晷景至日昃後便起云時至矣卽束帶燒香往師經堂中遍禮道衆徑出
還所住廡衆人正言應就齋去日晡間其弟名子平往看正見子良燒香出還住戶問子平何以來
答云姨孃氣發喚兄還合藥煮湯語云我體亦小惡卽時欲服藥竟當還若未卽還汝可更來仍見
鐺中溫半升酒子平馳還說此姨母驚怪亟令走往已正見偃臥子平不敢便進俄頃所生母及姨
母續至見便悲叫問何意何意唯閉眼舉手三彈指云莫聲叫莫聲叫誤人事其母欲捧頭起而蹴
巾轉猶舉手再過正巾須臾氣絕時用香爐燒一片熏陸如狸豆大烟猶未息計此正當半食頃耳
時年二十先已裝束內衣止著眠衣加以法服並堅結其帶脫羣襦卷辟之容質鮮淨不異於生一
切聞見莫不歎駭以二十九日日昃後殯仍造塋塚於東岡十一月三日丙寅日昃後窆卽捧土成
墳此後音影寂寥未通寤寐將同人神之隔爲機會俟時乎其得道原由品號自具顯所受計中今
略疏在世事迹共所聞見如此故載之記前又爾日於書案上得四函書並封題上皆濕一函與師
一函與後廡姨母等一函與舅徐善明一大函有四紙與南館東山諸道士並是告別同云二十七

日計此當時是從朱陽還仍作書作書竟便燒香也又檢溫鐺中猶如常酒氣瓦盆中已被水湯無氣都不見藥蹤跡竟不測何所因託師既慷慨此事追恨不早研究亟令人委曲科檢諸篋蘊庶覩遺記而承無一札文幸云二十六日燒兩束書可百餘紙不聽人見意疑此必皆已焚毀懊惜彌切心猶未彌十一月旦甲子試自往燕口山洞尋看果見封投一大函登崎嶇鉤取拜請將還開視卽是從來受旨五月唯有夏至日後四事六月七月並具足從八月後至今年七月末止疏目錄略舉事端稱云而已未測亦並有事如六七月而不存錄爲當不復備記止經略如此邪今以意求恐是不復疏之何知爾尋初降數旬中已得閑靜後既混糅恆親紛務不展避人題之紙墨直止錄條領耳想此十餘月中訓諭何限惜乎弗問此師之咎矣又從今年八月至十月都不復見一條又尋所燒者定當非此例無容一封一焚故也又從來有令師及姨母知者止有數條一者初夏至日晝眠內外怪責不得不說二者斷不食脯肉亦被怪不得不說三者與師共辭請兩真旨令改朱用墨此不得不說四者師得停召真旨令告知此

右周傳

五月夏至日未中少許

注

天監十四年乙未歲五月二十三日乙丑也

在所住戶南牀眠始覺仍令善生下簾於時住在西阿姨母廨中善生是兩姨弟本姓朱七歲時在永嘉病十餘日正爾就盡隱居若爲救治仍捨給爲道子

又眠未熟忽見一人長可七尺面小口鼻猛眉多少有鬚青白色年可四十許著朱衣赤幘上戴蟬垂纓極長紫革帶廣七寸許帶繫囊繫囊作龍頭足著兩頭烏烏紫色行時有聲索索然從者十二人二人提裾作兩髻髻如永嘉老姥髻紫衫青袴履縛袴極緩三人著紫袴褶平巾幘手各執簡簡上有字不可識又七人並白布袴褶自履屨悉有所執一人挾坐席一人把如意五色毛扇一人把大卷書一人持紙筆大硯硯黑色筆猶如世上筆一人捉繖繖狀如毛羽又似綵帛斑駁可愛繖形圓深柄黑色極長入屋後倚簷前其二人並持囊囊大如小柱似有文書挾席人舒置書牀上席白色有光明草縷如荊子但縷織尤大耳侍者六人入戶並倚子良牀前此人始入戶便皺面云居太近後仍就座以臂隱書案於時筆及約尺悉在案上便自捉內格中移格置北頭問左右那不將來答云官近行不將來乃謂子良曰我是此山府丞嘉卿無愆故來相造子良乃起整衫未答云予時自覺起對分明而人見身猶臥恍惚不自解

仍問曰今日吉日日已欲中卿齋不答依常朝拜中食耳未曉齋法又曰中食亦足但夏月眠不益人莫恆貪眠又答體羸有小事竟覺倦倦如欲眠不能自禁曰小小消息無苦因風起吹繳欲倒仍令左右看繳赤豆在庭中戲走來垂至繳邊左右以手格去郎善又來架子上取塹觸此左右善便倒地此左右以手接之此人問那得此小兒子子良答家在錢塘姓俞權寄此佳又曰勿令裸身善神見之 小男兒名赤豆年五歲是俞僧夏兒云多災厄暫寄道士夏月裸身出戲

又問郎善何人子良答家在永嘉依廕陶先生又曰陶有美志爲人所歸投 郎善姓徐樂成縣人年十六七許先依隨隱居還山今已去

又語子良曰卿父昔不無小過釋來已三年今處無事地自云墳塚在越雖自羈迴亦不願移之南頭有一坎宜塞去其今欲同來有文書事未了不果明年春當生王家以其前過未盡故復出世

子良本欲以甲午年迎父柩出西事不果周事角家過此未申酉歲乃更議當是其父不許移故因此告卽往驗果有坎已塞竟

卿前身有福得值正法今生又不失人神之心按錄籍卿大命乃猶餘四十六年夫生爲人實依依

於世上死爲神則戀戀於幽冥實而論之幽冥爲勝今府中闕一任欲以卿補之事目將定莫復多言來年十月當相召可逆營辦具故來相告若不從此命者則三官符至可不慎之子良便有懼色此人曰卿趣欲住世種罪何爲得補吾洞中之職面對天真遊行聖府自計天下無勝此處子良乃曰唯仰由耳又曰卿自幼至今不無小愆可自思悔謝若不爾者亦爲身累凡修道者皆不裸身露髻枉濫無辜起止飲食悉應依科聊復相告言盡於此今還所任方事猶疑冀非遠耳卿勸吾言勿示世中悠悠之人山中同悉知之無嫌便下席未出戶見門上有令春劉白等 令春是姨母間婢子劉白是白從子

乃又曰勿令小兒輩逼壇靜靜中有真經前失火處大屋基今猶有吏兵防護莫輕滂慢其輩無知事延家主 門是前中隔閣靜屋及壇在閣外經堂被燒移經出安靜中堂屋四間東二間作齋堂西二間姨母住始其年四月二十三日遭燒四間都盡姨母修黃庭三一供養魏傳蘇傳及五嶽三皇五符等所云真經當指在此但未解空基處云何猶有防守之

卿姨病源乃重雖不能致斃亦難除子良因問不審若爲治療腹中又有結病何當得除答曰不可

卽除歲月之間不知若爲耳腹中亦有卒可差別當向卿言 前云事延家主家主卽姨母所以因說病事不由於請問也姨母年四十七素患風冷恆上氣腹左邊有氣結如杯大從來醫藥所不能愈也

令春等去便下堦而滅 尋神明出入無方乃並牀不疑而亦有避人時蓋是渴穢賤者不可觸冒右一條是夏至日書所受記書四籠白紙 此丞依別自是趙於保命四丞居火者名威伯河東人主記仙籍并風雨水領五芝今玉草事出真誥

又別夢見懸巖峙壁鬱然若似青嶂中某在山下望見山上有二人一人著遠遊冠錦繡之衣其意言是保命君一人猶是向高座上老子也相對而談某不解其語須臾便覺竟不知此二人後何所適 右一條二十八日晝寢夢記書兩籠小白紙

六月一日夜 凡此端皆題紙背作乙未年

復見前丞來乃著進賢冠猶如前侍七白衣人所執持亦不異舒坐席坐南牀復有二人年並十五六許形服鮮麗皆作兩髻著衣似單衣復如袴似繡而非丞言曰一日有期差不爲疑仍指東邊一

人曰此華陽之玉童定錄保命二君令來相諭又指西邊人曰此紫陽之侍童二君昨詣紫陽陳卿事源紫陽乃戲言大族貞虛其中凌雲者理非一人定錄曰此蓋見由耳紫陽笑曰東華紫薇當焚錄邪丞曰吾想此言實是賞讚卿也華陽童乃言曰夫騰龍駕霄之才理非涉世之用榮華籌略之心豈會神真之想爾情無滯念智臆蕭豁是以果而速之若無此虛豁之心者則一志而不及一向而不迴此焉能得道爾既無才學可稱又乏至德之美特是採緣訪命加以迹少愆累心無沈滯故得耳勿區區於世間流連於親識眷眄富貴希想味欲此並積罪之山川煮身之鼎鑊善思此辭勿足爲樂若必寫此則仙道諧矣又問曰陶氏才識何如答曰德操淵深世無其比又曰然恐緣業不及如何紫陽童仍言曰君言君言是稱紫陽語也神仙易致而人德難全是故二象雖分其間猶混真道可聞而不可見人道可見而其行難聞夫爲人者皆貪虐誕欲恣情任美所以三惡不離其心五情不節於體皆由先世種罪多故耳若生在中國知有道德人身完備才明行篤者皆宿命有福德也述君言訖此爾宿世已生周家君之餘嗣也今生又在周家雖出庸俗先功未弭故得受學仙宮任表神府君昨歎云一與其別已數百年矣誠子之辭訖勸子之言盡可善勸之方當往來不爲久別又仍曰君

已改子名字因人相告二童便出戶丞曰二人言盡此皆真君授其語今相諭吾不得停尋更來夜席便滅右一條一日夜所授記書兩小度纔白紙丞猶是趙丞華陽童依後記云姓景名上期紫陽童云姓鳳名靈芝按此云已改子名字別人告而後八日來說所改名字卽猶是此童也當是其今未敢言耳

六月四日夜華陽童來授曰爾旣挺思合神必不會世心中人惟欲求利爾不能益則有不悅爾今事人尊者若罵詈爾得罵時當存念身神耳可得聞而心勿受爾莫口應若罵畜生禽獸之屬皆當卽沐浴此爲賊身之大穢穢則真神不降邪氣侵人昔有劉文長師李少連少連苦酷不道鞭打罵詈無有時節文長受而口對積十一年山神遂侵試之後成邪注病今在保命丞間爲散使緣前身有忠朴之心故得爲正神所使少連今猶在河間晝夜辛苦不可得見譬如此事可不慎之

言此而去

右一條四日夜所授記書一白牋紙去歲聞其家說姨母常修服諸符恆令爲書其旣始有通

感於書符失時兼亦不謹姨母責罵甚苦乃云人家養犬亦須守吠逐鼠養汝已不得供養止書符寫書而不用意用汝何爲伊於時意色極不好今由此告當由斯源也姨母以其年少伏事人

恐過失每課屬非一從此後得罵便喜笑悅竟輒沐浴大小咸怪如此至於師長之間實未嘗加以言色今則文長少連爲譬當以在三之義均耳

六月六日夜見一人來儀服甚整著丹衣青帔芙蓉冠冠上又有小平蓋蓋青色紫緣邊背上佩三青色鈴年可二十餘面甚白微有鬚侍者四人二男二女至良久乃言曰我是桐柏仙人鄧靈期聞子合道故來相慰子良曰凡庸下賤少樂正法幸藉緣會得在山澤何期真聖曲垂啟降自顧腐穢無地自安若前緣可採願賜開度仙人曰善哉辭也子干生已來種福多矣自然而會何待開授度子者當自有人吾特嘉子緣德來結交耳幸無謙辭桐柏當復有來者當授相待吾今去矣下旬間更相過方事遊適兩念相存執手而去 右一條六日夜所授記事一青紙 依後別記鄧始得爲桐柏帝晨執蓋御史領華陽學仙禁真誥中所無云桐柏復有來者當謂後徐元真也

六月八日夜紫陽童來裝服如前言曰欲知我姓字不子良曰願聞之童曰我本姓王字子遷太原人宿命時父爲陳留太守仍移居丹陽我年十五化前身有福德生爲人復修功德死爲神補紫陽內宮玉童賜姓鳳字雲芝君今改子名爲太原字虛靈 童凡所稱君者皆紫陽也不改姓仍取周

也

此名字中皆有旨趣今略爲述之太者元始之極而質象含真元者謂應虛無之炁挺分所至非修身立功所得虛者謂形同乎假志無苟滯蕭條而應真靈者謂在世而感神棄世而爲靈此表裏成功饗流後裔也略陳其綱紀如此別有幽奧處未可便及此名不施於世且莫顯示子良字元獻此乃施之善名亦不勝於世直是施於冥中耳言訖便去 右一條八日夜所授記書一白籐紙 其羣從兄弟皆以子字爲名子良是其本父乍生便名以無別小名也字元和者是癸巳年十七於華陽東嶺冠師爲作此字燒香啟告以授之按後記云所改名卽是青錄玉文者當周名仍取以名之

六月九日夜夢聞人語不見人形聲氣高厲謂子良曰若披罩紫蓋遊適偃房者神仙之漸也 惟言此而已意所言是定錄神君隱告也

須臾覺便見前丞丞曰向來者爾識之不答曰不識丞曰是真君爾未宜見之故遙相告爾 按此前華陽中惟丞帥及童來耳真君都未降今此方爲其始也

又曰爾聞血臭不答不聞丞曰爾體血流釋那不自知答曰自謂無血唯汗耳丞曰汗之與血一何異乎汗者血之精華人血猶如水寒則上凝夏則上清清則流泄易凝則決冰而血出是爾破塘虛微故不能止於流耳人血如淵水不厭其溢但患其竭吾有築塘之術當爲爾治之今但俟景搢華亦能微微爲效吾今且去外已有人來下席而滅卽見一人入侍者三人來至牀前而言曰我是張孝字子安滎陽黎井人也 直言此而滅見年可三十許巾紫方冠著繡衣當是高仙人 右一

條九日夜一夢聞一受記書一白籐紙 依別記張子安是華陽中蕭閑堂主上真誥所無

六月十一日夜有一女人來嶺裏形貌妍麗作大髻通青衣言曰今夕易遷中有四人欲來爾所住處今旣在此當不果至十九日只當來耳子良言侍從師還此不知今夕有垂降者欲還佳處仰俟可得爾不女曰旣已在此已夜不須復還恐人相疑亦不須道今夕來此意子良問不審氏字可得示不女曰姓李字飛華淮陰人來易遷中已九十四年旣始受學未能超進今者之來乃趙夫人見使便別曰十九日期君於西阿子良斂手而別 此女年可二十三十四許有兩人同來惟此女言耳 一人當是侍者也 右一條十一日夜所受記書一白籐紙 此日師出冰館仍上山日沒後

還東嶺周送入至佳處已黃昏仍留其停宿於時在冰口屋尋嶺內清淨神女不集西廡混雜反欲相從未達此趣以爲於邑

六月十二日有五人來乃三更中一人年可三十餘黃華冠雲錦毛衣侍者四人執紫毛節持流金鈴此馮真人也真誥有

一人芙蓉冠絳繡衣侍者二人無所執則張子安也真誥見

一人芙蓉元冠綠繡衣侍者二人則中山人洪先生也真誥無

一人敖幘朱衣紫草帶侍者六人皆公服悉有所執持則樂丞真誥有

一人兩髻亦繡衣此華陽童右五人前三人列坐南牀丞及童坐書牀子

丞前進曰今夕有高真來可起可起子良因起拜前者前者曰可坐子良還坐又曰周生修功積德可謂不負其志乎張君曰明鑒鏡察理當照其曾懷耳答曰如來辭洪君曰見周生不中路怠廢乎答曰不怠廢雖怠亦不能毀其金簡丞曰周生可謂保仙之人前者乃問子良曰今日諸人來暢爾懷抱不子良答曰枉蒙上真賜降腐穢欣懼交心無以自厝乃笑而不言華陽童子曰此諸真人君

當不盡識今將相告上者嵩高真人馮先生第二卽蕭閑仙卿張君第三卽中嶽仙人洪先生第四
乃保命府丞樂道士第五則我華陽之天司農玉童故令君悉知姓位此中諸位任何如世上侍中
公卿邪子良答曰真仙高靈豈得以比於塵俗丞曰能察幽測冥者周生是也今者既曲紆真降願
各爲其述一文真人曰卿是其明證可前作答曰敢不聞旨但恐卑人居前非禮耳丞乃令子良襲
紙染筆口授曰華景輝瓊林清風散紫霄仰攜高真士凌空馭綠輶放彼朱霞館造此塵中倏有緣
自然會不待心翹翹馮真人授曰太霞鬱紫蓋景風飄羽輪直造塵滓際萬穢澆我身自非保仙子
安見今日人過此未申歲控景朝太真冥緣雖有契執德故須勤張仙卿授曰寫我蕭閑館遊彼塵
喧際騁景蓋飛霄尋此人間契周生一何奇能感元人轍無使凌雲幹中隨巖霜折洪先生授曰靈
風扇紫霞景雲散丹暉八素不爲迴九垓何足巍志業雖右少一字習之亦成微助此今日事金闕方
共歸華陽童授曰懸臺凌紫漢峻階登絳雲華景飛形燭七曜亦殊分寫此步塵穢適彼超世君助
哉二祀內無令邪世聞方爲去來會短辭何用紛詩畢馮真人曰諸人所述足以相勸戒可自思緣
運尅厲丹心當復有來者若能用思入微飛龍輶於霞路奏鳳響於雲衢神童啟節玉女侍軒豈待

彌劫乎得道悉在方寸之內耳不必形勞神損也世人惟知服食吞符苟非其分亦爲徒勤更不及專營功德善積功滿道亦可議但於後生得之不施於今身矣此言亦可告家人令知之子良唯唯奉從張曰真君此言可謂至教若更能超踰往此則二府希之不難矣蕭閑堂將爲周子之遊館乎洪君曰仁功苟積則選爲真人府中小丞其亦未必止此丞曰其功已定亦何必須勤勤童曰二君亦適人所爲不必相逼若能積業更深則成真人功夫若怠猶當不失此丞言畢同辭別徘徊戶內而滅右一條十二日所受記書四白紙此中五人三人已經來馮真人樂丞今降案真誥有西嶽真人馮延壽疑此應猶是也樂丞字長治咸陽人主災害四丞中之一也夫仙真詩詠才辭通皆相類真誥中有此甚多亦無相越者尋此降集所受辭意如似略示東華保晨之舉也

乙未年六月十三日夜見前帥來言曰比者真仙遊降足致欣暢乎我比恆有事遂成冥隔子良答曰近來乾坤澄淨七景齊明仰降高靈稍蒙已數但滓穢無以克承耳帥曰是卿千秋之功無嗟以滓穢爲辭但卿六世祖肩爲譙郡時尤好射獵殺傷無數賴其中時復營功德罪已得釋卿不宜復食肉食肉恐先源逮卿幸可慎之仙藥草自足何急噉此恐卿不悟故因暇來相報爾子良唯承受